



8. september 2023

UKA 2023/119

Inatsisartut Suleriaasianni § 36 naapertorlugu apeqquaqaat aallaavigalugu oqallisissiaq imaattoq matumuuna saqqummiuppara:

Angajoqqaat meeqqaminnik 18-nik inorlugit ukiulinnik annaasaqartillugit qaammatit arfinillit angullugit akissarsiaqartinneqarluni aliasuuteqarnermi sulinggifeqarsinnaatitaanissaannut ilumut pisinnaatitaaffinngortissaneripput pillugu oqallisissiatut siunnersuut.

(Inatsisartunut Ilaasortaq Nivi Olsen, Demokraatit)

Meeqqagut tamanit asanerpaasaraagut. Suna tamaat tikillugu ajunngitsumik perusuppagut. Angajoqqaat tamanna pisussaaffigiinnarparput. Uummatitsinni tamanit asanerpaasarigatsigit nuannareqqinnaarlugu paaqqutaraagut.

Asannineq taanna killeqanngitsoq aamma meerarisaq qimagussimatillugu aliasunnerujussuarmik kinguneqarsinnaasarpog. Meerarisaq qimaguteriasaartarnera qaqutigoortumik pisarpoq, kisianni pisarpoq. Angajoqqaallu qimaguttoorsimasut aliasuutaat nammakkuminaatsuusarpoq.

Aliasuuteqarneq taanna inuiaqatigiittut ataqqissallugu pikkorluppallaarpugut. Imaappormi Namminersorlutik Oqartussani imaluunniit kommuunini ullut arfineq pingasut sulinggifeqarallarnissaminut pisinnaatitaaffeqarpoq¹, taassumalu kingorna suliarortinneqaaqqissalluni. Namminersorlutik inuussutissarsiutilinni isumaqatigiissut tamanna malissallugu pisussaaffilerneqanngillat.

Uani isumaqarpunga minitaqarata paasisinnaassagipput ullut arfineq pingasut iluanni suliartoqqinnissaq piareersimaffiqarsinnaanngitsoq. Meerarisamik toqkkut qimaguttoorneq ullut arfineq pingasut ingerlaneranni aliasuutimik iluarsisoqarsinnaanngilaq. Angajoqqaat piareersimannginneratigut aammalu napparsimanermik aallaavilerlugu sulinggifeqalernissaat mianernartuussaaq.

Taamaattumik isumaqarpunga meerarisap toqkkut qimagunneraniit qaammatit arfinillit angullugit aliasuuteqarnermi sulinggifeqarsinnaaneq pisinnaatitaaffinngussasoq. Aliasuuteqarnermi sulinggifeqarsinnaanissamut periarfissaqartitsineq, aliasuuteqartup qaammatit arfinillit akissarsiaqarsinnaanissaa pisortanit qulakkeerneqassaaq. Angajoqqaat eqqissillutik toqqissimallutillu meeqqami qimagunnera aliasuutigisinnaasariaqarpaat, eqqarsartariaatsikkut misigissutsikkullu peqqissuunissamut aamma professionaliusumik ikiorneqarnissaq taamaasilluta qulakkeernerussagalarparput. Piffissaq ungasinnerusoq eqqarsaatigalugu tarnikkut ajornartorsiuteqalernissaraluaq taamaasilluta aamma pinaveersaartinnerusinnaallutigu.

Tamatuma avataasigut angajoqqaat aliasuuteqartut ilaqutariittut ikioqatigiinnissaat aamma periarfississavarput. Aliasuuteqarnermi sulinggifeqarsinnaaneq taamaasilluni suliarortariaqalernissaraluaq

¹ Nal C I, 4-1-37



aammalu eqqarsartaatsitigut ajornartorsiutit imaluunniit aappariinnikkut ajornartorsiutit pinngitsoortinnissaanut qulakkeerinneqataasinnaassagaluarpoq.

Ataatsimut isigalugu meerarisaq 18-nik inorlugit ukiulimmik toqukkut qimaguttoqartillugu aliasuuteqarnermi sulinngiffeqarneq aallaavigalugu akissarsiaqarsinnaatitaaneq eqqarsartaatsikkut peqqissuunissamut aammalu ilaqutariit aalajaatsumik inissisimanissaannut iluaqutaassasoq isumaqarpunga, aliasuuteqarnerlu peqqissumik suliarinissaa taamatuttaarlu aningaasatigut toqqissisimanissaq attatiinnarlugu.

Inuit assigiinngitsuupput, isumaqarpungalu aliasuuteqarnermi sulinngiffeqarneq paarnaqqasuussanngitsoq, imatut paasillugu sulileqqinnissamut piareersimagaanni piffissaq aaliangersimasoq akissarsiatigut aaqqiivigalugu periarfissaassalluni.

Paasisinnaalluarpara meerarisamik annaasaqarneq inuunerup sinnera qaangerneqarsinnaanngitsuummat, taamaattorli inuiaqatigiittut aliasuuteqarnermi sulinngiffeqarsinnaanermik periarfissiinitsigut aliasuuteqarneq annikillisaaqataaffigisinnaassavarput.

Naalackersuisut partiillu sinnerisa oqallinnermut immersuutissaat qilanaaraakka.